



### Descripziun dal proget – GROND BAL LADIN

L'Uniun dals Grischs organischa ils 7 november 2009 il GROND BAL LADIN, üna sairada da gala, chi dess avair lö - sper la vöglija da festagiar insembel la Rumantschia - a favur da giuvens artists e giuvnas artistas da la regiun Ladina. Ils giuvens artists e giuvnas artistas dessan avair la pussibilità da preschantar lur musica, lur purtrets lur progets da teater ad oters artists ed artistas – ad usché dit newcomers ma eir ad artists ed artistas arrivadas – ed ad ün public interessà.

Implü dess gnir inrichida la sairada cun intermezzos dad artists ed artistas arrivadas – sajan quai concerts cuorts o produziuns da teater e cabaret. Planisà es eir ün'exposiziun (aucziun) cun ouvras d'art figürativa. Quists artists arrivats as prodüan ed expuonan gratuitamaing a favur dal benefizi. L' impissamaint da benefizi da l'Uniun dals Grischs es descrit sülla pagina 2 perche ch'el nun ha organisatoricamaing e finanzialmaing dachefar nüglia cul GROND BAL LADIN.

Üna resposta affirmativa han dat fin uossa Ladina Gaudenz, Corin Curschellas, Dumeng Secchi, Not Vital e Florio Pünter.

Dals artists giuvens fan part Rezia Peer, Bianca Mayer e Flurina Sarott cun "Las randulinas".

A partir da las 22h invidaran ils „Fränzlis da Tschlin" ad üna o tschella trais-cha – üna festa Engiadinaisa sainza sot nun es üna festa Engiadinaisa!

Ed üna festa Engiadinaisa es eir be üna buna festa sch'ella ha ün „open end", co chi's soula dir per bun rumantsch. Perquai daja a partir da l'üna la not ün uschè dit „palc avert", sün qual differentas gruppas da musica as pon prodüer. Ün dals böts dal GROND BAL LADIN es da far üna punt raffinata tanter musica tradiziunala sün ot niveau e musica rumantscha contemporanea.

Il GROND BAL LADIN ha lö illas salas generusas da l'Hotel Val Sinestra. La chasa cun lunga tradiziun ans sta a plaina disposiziun, perquai cha la stagiun da stà finischa ils 1. da november. Uschea po gnir concepì e realisà ün program rich e fich varià. Differents puncts da program pon avair lö parallelamaing in differentas salas, ed il giast ha la libertà da tscherner che chi til interessa. Dar üna baderlada cun ün literat giuven d'ürant il desert? O participar ad üna performance experimental, ad ün intermezzo cun musica da clavazin o listess plütost verer ün pêr scenas da teater o da cabaret?

Pussibel es pero eir cha'ls artists e las artistas as drizzan vers ils giasts. Ils suns e tuns d'üna già accumpognan il giast davent da sia maisa, in viadi vers il buffet da salata...

Chi chi ha vöglija da durmir i'l vegl hotel da cura, po postar üna stanza per ün predschn adattà e giodair üna culazin da cumpagnia in dumengia a bunura.

Ed a la fin finala as tratta da far festa! Üna festa dinamica cun ün public heterogen. Discuter e baderlar, chantar chanzuns, tadar musica, ballar fin chi's vain mez stuorn, mangiar e baiver...

Art viva e mouvainta – ed il GROND BAL LADIN dess dvantar üna festa viva e mouvantada!



### Impissamaint da benefizi da l'Uniun dals Grischs

Ûn pêr eivnas avant la saira da festa vegnan tschernüts quatter progets da giuvens artists e giuvnas artistas chi derivan da la regiuns Engiadina, Val Müstair e Bravuogn, chi dessan gnir sustgnüts finanzialmaing. Ils artists e las artistas chi annunzian lur interess nu pon amo avair accumulì lur 30avel anniversari e dessan avair üna „biografia artistica“ - bainschi cuorta, ma existenta. Üna giuria da tschinch fin set artists arrivats da las regiuns manzunadas tschernan ils quatter progets e tils onureschan. Pro'ls participants da la giuria dessan esser represchentads artists ed artistas our da tuot las spartas d'art – il listess principi dess eir esser ün muossavia pro la tscherna dals progets dals artists giuvens. Diversità, originalità e variaziun dessan gnir resguardats.

Il GROND BAL LADIN svesa fuorma il rom festiv per quist act da benefizi. Uschea dessan gnir preschentads ils quatter progets sustgnüts d'ürant la saira da festa a'l public preschaint. Scha la preschantaziun dal proget es fatta in fuorma d'ün intermezzo artistic survegnan ils artists o las artistas üna gascha ed as partecipeschan cun quai vi dal programm cultural da la saira.

Ils mezs finansials per il sustegn da quists „progets giuvens“ vegnan miss a disposiziun (sün dumonda) da persunas privatas, sco eir da firmas indigenas. Las finanzas da la part dal benefizi vegnan organisadas in möd tuottafat independent da la sairada GROND BAL LADIN.